

Media Title : Harian Metro
Headline : Pesara wanita rugi RM760k diperdaya 'pegawai polis'
Date : 17 April 2025
Section : Lokal
Page : 11



Pesara wanita rugi RM760k diperdaya 'pegawai polis'

Bukit Mertajam: Seorang pesara wanita mendakwa diperdaya sindiket panggilan telefon menyebabkannya mengalami kerugian wang simpanan berjumlah lebih RM760,000.

Insiden bermula Februari lalu apabila mangsa berusia 73 tahun menerima panggilan telefon daripada seorang individu yang memperkenalkan diri sebagai 'pegawai polis' dari Balai Polis Pahang.

Ketua Polis Daerah Seberang Perai Tengah Asisten Komisioner Helmi Aris berkata, mangsa diberitahu terbabit dalam kes pengubahan wang haram dan beberapa jenayah lain.

"Suspek mendakwa akan membuat tangkapan ke atas mangsa sebelum memaklumkan mahu menyelesaikan dan memadamkan rekod kesalahan wanita berkenaan.

"Mangsa diminta memberikan maklumat perbankan untuk tujuan semakan sebelum dia menerima beberapa mesej OTP (kata laluan sekali guna) diarah oleh suspek untuk membuat pengesahan," katanya dalam kenyataan yang dimuatnaik di Facebook Ibu Pejabat Polis Daerah (IPD) Seberang Perai Tengah, semalam.

Katanya, mangsa mula berasa curiga apabila suspek masih menghubunginya pada bulan ini lalu membuat semakan ke atas penyata akaun bank miliknya.

"Mangsa terkejut sele-



Mangsa diminta memberikan maklumat perbankan untuk tujuan semakan sebelum dia menerima beberapa mesej OTP (kata laluan sekali guna) diarah oleh suspek untuk membuat pengesahan"

Helmi Aris

pas melihat terdapat 59 transaksi pindahan wang ke enam akaun bank berbeza dari Februari hingga April tanpa pengetahuannya dengan jumlah keseluruhan RM764,511.17," katanya.

Katanya, mangsa tampil membuat laporan polis pada Isnin lalu dan kes disiasat mengikut Seksyen 420 Kanun Keseksaan.